



### On fâmeus djârdinî.

José HENNEAUX  
(wallon de Vesqueville)

Nèstor astét assè vantârd. Tot ç' k' i fjét, i l' fèjèt todi mî k' lès-ôtes. One anéye ki les cabus n'avint nin bin vnus, i 'nn-avét a crèvè... I sotnét k' a s' corti i 'nn- avét dès cis dol grocheûr d' one tchèsse dè bû.

S' vèjin Batisse, li, s' plindét kè c' astét damadje. Ç't-anéye ci, c' astét one fwârt mwêje anéye po lès cabus, ca i n' avét nin grand tchôze.

– Ô, di-st-i Nèstor, si t' avés mètu dès-angrès èt do bigô, t' ènn-ôris ossu... A cwè Batis' rèspond :

– Twè, t' ès todi mî k' lès-ôtes...

Adon, Nèstor lî dit :

– Tè n' ès k' a vnu dèmwîn al môjon, tè vièrès.

Lu londmwîn, Batisse va al môjon da Nèstor po 'nn-alè vèy lès fâmeûs cabus. Nèstor n' astét nin la, c' èst sa fame ki vint lî drouvu l' uch.

– Bondjou Zélie, Nèstor n' èst nin la ?

– Nèni, il èst voye aratchè dès truke, mès djè pu motwa fère ôk por vos ?

– Bin, c' èst kè Nèstor m' avét promètu dès cabus... Èt djè vné lès kî.

– Bin Batisse, si ç' n' èst k' ça, djè va vos a dnè.

Zélie va al côve èt rvint avu deûs cabus dol grocheûr d' one tchèsse dè tchèt...

– Tènez Batisse, v's ôrez lès deûs pus gros....

Batisse lès prind, dit mèrci a Zélie èt pus rintère a sa môjon an riyant dins sa bârbe. Lu londmwîn, Batisse vèt Nèstor èt i lî dit :

– Manteûr, tè cabus n' sont nin pus bès k' lès cis dès vèjins, ni co k' lès min.nes !

– Tès' tu, di-st-i Nèstor, Zélie s' è trompè, èle t' è dnè dès chous d' Brusèle.

**Malêjis mots :**

**bigô** = purin / **bû** = bœuf / **cabus** = choux / **djârdinî** = jardinier / **kî** = chercher.